

東
華
續
錄

東華續錄

同治五十九

臣王先謙敬編

臣張式恭恭校

九月丁巳朔命戶部左侍郎譚廷襄會同三口通商大臣崇厚辦理義大利亞國通商條約事務○賞八旗兵丁一月錢糧○命楊岳斌籌撥哈密軍餉○予福建殉難道員孔昭慈建祠○戊午蔣益澧奏請裁廣東太平關書吏丁役並各項陋規由巡撫派員協理許之○己未諭軍機大臣等前因楊岳斌奏曹克忠遽赴陝西請催還甘肅一摺當經諭令劉蓉嚴催該提督星夜回甘並將該提督交部議處矣茲據曹克忠奏瀝陳患病並歷年軍務情形一摺曹克忠帶兵剿賊戰功卓著籌墊軍餉激勵軍士尤能以公事爲重見在甘省軍務未竣正賴得力大員督兵剿辦豈可遽赴鄰

疆置甘省軍事於不顧且該提督僅係暫時給假並未開缺又豈可擅離職守著卽恪遵前旨折回甘省俾所部將領有所稟承奮勉立功以副委任其各營勇丁著楊岳斌責成王得勝等妥爲約束申明紀律不得滋生事端至餉銀糧米爲軍營最要之需何得久任缺乏陝甘唇齒相依所有曹克忠舊部餉需軍火著劉蓉趕緊籌款撥解源源接濟並著楊岳斌迅籌糧米運解各營均勻散撥不得藉詞推諉致誤事機將此由六百里諭知楊岳斌劉蓉並傳諭曹克忠知之○庚申諭軍機大臣等曾國荃奏行抵隨州知捻逆東竄卽日由襄樊回省料理餉項布置東路防剿事宜一摺此股賊眾剽悍異常若探知有西趨之信再行布置恐已不及著該撫仍遵上月二十九日諭旨馳赴南陽會同李鶴年妥籌防剿事務或先赴襄樊一帶駐紮如賊匪有西趨之信卽日馳抵豫疆

合力勦辦嚴防回竄總之此股賊眾非數省大吏同心協力不能
蔽功該撫務當隨時與曾國藩妥商進止機宜以赴委任曾國荃
一軍餉項著官文妥爲經畫源源接濟毋任缺乏將此由五百里
各諭令知之○予故陝西漢中鎮總兵官蕭慶高祭葬卹蔭加等
謚武毅○飭粵海等關迅解內務府各項銀兩○命刑部尙書綿
森戶部左侍郎譚廷襄赴河南查辦事件○辛酉諭軍機大臣等
閻敬銘奏髮捻東竄連日擊退一摺捻眾合股東竄直撲鉅野經
知府王成謙遊擊王正起等督兵迎勦各斃賊數百名該逆竄偏
運河攻撲濠牆自二十七日至三十日往來撲渡百計圖逞官軍
槍礮如雨晝夜嚴防水師亦飛棹河中上下轟擊該逆無計可施
均由鄆鉅西南遁竄此次東軍小捷二次大捷一次扼守河岸五
晝夜之久克保無虞均屬異常出力著准閻敬銘擇尤彙案請獎

該逆狡悍無比雖被擊敗竄並未大挫兇鋒誠恐以僞遁懈我軍心再圖猛撲閻敬銘仍當督飭地方印委各員並在事員弁實力嚴防不得以賊已退卻稍涉大意該撫見令王成謙由鉅野截賊歸路潘鼎新一軍已抵濟甯劉銘傳劉秉璋劉松山張樹珊等均陸續抵東正可乘此聲威合力兜剿著曾國藩飛飭各軍奮力剿洗務須一鼓殲除毋任再有竄突上年張逆在雉河集老巢以各軍不能齊心致令免脫貽害至今此次又有合圍之勢各軍如能奮勇擒渠朝廷不難破格獎賞如或縱寇殃民卽由曾國藩等嚴參治罪毋稍姑息賊向西南必由蘭考入豫李鶴年務當督飭各軍防其回竄並與湘淮各軍聯絡聲勢用收夾擊之效張之萬已否前赴新任賊如竄徧淮徐窺伺皖境吳棠張之萬喬松年英翰常各飭防軍出境會剿不得強分畛域坐觀成敗致干重咎李鴻

章仍遵前旨帶印出省駐紮徐州會同閭敬銘等商辦軍務潘鼎新等皆係淮軍該署督卽酌帶親軍一二營趕緊赴徐布置不必瞻前顧後致有耽延本日據劉長佑奏力疾銷假照常視事並請來京陛見一摺劉長佑上年業經來京陛見此次著毋庸前來賊蹤見竄東境黃運河防務喫緊著卽督飭張樹聲等將大名等處加意籌防以期益臻周密將此由六百里各諭令知之○予山東陣亡遊擊貴日華等祭葬世職○壬戌諭內閣榮安固倫公主額駙瑞煜著更名符珍○諭一等雄勇公符珍已指爲榮安固倫公主額駙其品級章服照例用外恭親王長女榮壽公主額駙一品蔭生志端著先行賞給頭品頂帶該部毋庸照例奏請並著賞戴雙眼花翎惇親王第五女額駙一等公堃林第七女額駙一等男恩銘均著賞戴花翎親王銜醇郡王長女額駙多羅貝勒那爾蘇

著賞戴雙眼花翎○癸亥諭內閣李鴻章吳棠奏勘估清水潭池下漫工請飭調大員督辦一摺本年揚河東岸池下隄工漫溢經李鴻章吳棠會同勘估籌款堵築亟須廉幹之員總理一切見在兩淮鹽運使丁日昌假期將滿卽著就近督工務期實用實銷餉不虛糜藉資得力○王得榜乞假養親以鄧廷枏爲福建布政使康國器爲福建按察使由延建邵道遷○甲子諭軍機大臣等李雲麟奏西北大局縱弛請力改前轍新疆撥解餉銀擬明定章程請保得力人員辦理古城糧臺並調員差遣畱差滿郎中暫辦分局事務各摺西北大局日壞李雲麟請力改前轍去名務實挈其綱領因推陳致弊之由冀得挽回之本所奏不無可採刻下兵力未厚自不能分必須俟三路兵力會剿克復烏魯木齊之後簡軍儲糧相機次第雕勦方能有濟至未經克復各城員缺亦未盡簡放自當

隨時酌量辦理餉項一節已照李雲麟另摺派大員經理應如何督催轉運之處仍著咨商辦法以期無誤北路防軍實未可恃著李雲麟與麟興錦丕勒多爾濟商酌妥辦認真整頓至寄諭之繁朝廷亦有萬不得已之苦衷似此言之諄諄尙且聽之藐藐若再不隨時訓飭其廢弛更不知若何新疆遠隔萬里軍情旦夕異宜豈能偏執己見其有因諸臣所奏隨時指示者正朝廷不肯遙制之處如果辦事大臣皆能實心實力何不可便宜從事李雲麟每次陳奏摺件議論繁多該員既知爲政不在多言卽當力求實效毋徒以舌辯見長也新疆撥解餉銀自應立定章程方能無誤軍食李雲麟摺內所稱徵派不宜大紛繁解款不宜存虛名經理必須有專責運解必須有定章用款不須勤奏報著戶部就所陳各節酌度具奏咨行各將軍督撫遵照辦理所請飭戶部堂官派精

明幹練之司員請賞大銜發給關防令駐紮歸化城專管新疆餉項事務尙恐力小任事難期得力見在察哈爾征兵將次過竣著派阜保馳赴歸化城專管催趨督運新疆餉項如各省允解之款久不解到卽由阜保查參仍會同德勒克多爾濟福興趙長齡商酌妥辦李雲麟請將內地各省應解之款均令其徑至歸化城欽派專員處交納不必復至晉省停畱是爲東路總局新疆各軍各城應用之款無論何款均由古城酌量分撥他處不必與聞是爲西路總局其烏科兩城各立分局專司轉運另摺請以候選直隸州知州阿克敦布管理古城糧局畱兵部郎中奇克慎管理烏城分局均著照所請行並著德勒克多爾濟福興督同阿克敦布由曾在北疆戍守出差及候補筆帖式教習三項人員內酌挑二十員名交李雲麟差遣委用並著該將軍等催令阿克敦布迅速啟

程母令逾十日之限李雲麟另片奏請以將來功績抵廣鳳應得之罪等語廣鳳應得罪名該部當查照定章辦理朝廷自有權衡李雲麟如果將來得有勞績豈能查覈註銷事君之道任勞尤當任怨何得嘵嘵瀆請所奏礙難准行將此由六百里各諭令知之

○丙寅允阜保請借支西征官兵糧餉並飭催帶兵官勒限前進

○廣江蘇鎮江府學額四名丹陽縣十名湖南祁陽一名○丁卯諭軍機大臣等都興阿奏請調天津礮船搜捕島賊並官軍續獲首夥各犯及請催山東等處月餉各摺片色爾固善等搜剿孤山餘匪尙屬認真惟長山各島必須乘船搜捕而奉天營船重笨駛駕不能合宜該將軍業已咨商崇厚酌調輕利小號兵船十餘隻赴奉搜剿卽著於船到後督率妥辦以期淨盡但當分別良莠毋任水師滋擾山東應解奉省月餉二月以後共欠解四萬兩其六

月以後餉銀並未起解殊屬延緩奉省待餉孔殷卽著閻敬銘督同藩司將新舊月餉悉數委解以濟要需山海關續收新關稅項並著成林隨時撥解毋稍稽延至都興阿奏請調慶春署理盛京副都統慶春已有旨署理廣州將軍員缺緊要應令來京請訓後卽赴新任所有盛京副都統一缺著暫令定安署理俟杜嘎爾假滿回任再令馳赴密雲新任錦州副都統前有旨令奕榕補授矣將此由四百里諭知都興阿閻敬銘並傳諭成林知之○己巳諭軍機大臣等閻敬銘奏髮捻逆股西遁經各軍沿途兜截疊獲勝仗見已全股竄出東境一摺賊股撲運河濠牆被擊西遁復經劉銘傳潘鼎新等軍截剿在蔡家陵馬家莊等處疊次獲勝頗有斬擒該逆知南路俱有重兵遂繞從荷澤西北狂奔又經劉銘傳等追及遂於初五六等日全股竄出東境向西南考城一帶竄逸著

曾國藩督飭劉銘傳潘鼎新劉秉璋楊鼎勳張樹珊等軍奮力追
逐毋令該逆再行竄撲他處蔣希夷保英二軍見已由曹縣折回
考城舊李鶴年督率馬德昭宋慶等軍與蔣希夷等軍會合夾擊
惟豫軍究嫌單薄恐難得手曾國藩務須嚴飭劉銘傳等無分畛
域認真合剿以免疏失鮑超一軍見自己抵豫境著卽飭令該提
督迎頭痛剿毋以馬隊未集爲辭遷延干咎曾國荃著仍遵前旨
趕赴南陽一帶駐紮防賊上竄之路該逆見尙盤踞考城蹤迹無
定河防仍形喫緊劉長佑閻敬銘仍當督飭在事各員晝夜防範
萬不可稍涉鬆懈張之萬已交卸啟程前赴周口與曾國藩商辦
防剿事務卽著迅赴清淮任事與吳棠悉心商酌以期益臻周密
吳棠應俟李鴻章到徐後布置穩固再行啟程赴閩浙新任將此
由六百里各諭令知之○諭崇實駱秉章奏會剿黔匪無兵可撥

請令劉嶽昭先平黔寇嚴樹森奏行抵重慶請撥兵統帶入黔並陳黔省事宜賊情大概繪圖呈覽請飭席寶田由上游會剿各摺片川黔毗連境地二千餘里上自敘永下至西秀時虞竄突若再分兵出疆專謀荆竹園一路則邊隘處處空虛防兵愈形單薄自係實情劉嶽昭見尚未出黔境著卽暫緩赴滇先將黔西大定之賊節節掃蕩嚴扼遵義一帶與湖南援黔之師上下夾擊使賊首尾不能相顧以冀先清黔境但不得曠日持久師老無功致赴滇更無時日並著李瀚章兆琛督飭李元度等軍迅將黔省下游實力剿洗該逆兼顧不遑必更易於得手其西秀一帶邊隘卽由崇實等嚴飭川東沿邊防軍扼要截擊以防該逆伺隙奔軼擾及完善嚴樹森由重慶入黔道梗所請撥兵三四千由該臬司統帶赴黔川省亦無可再撥著嚴樹森卽行馳赴劉嶽昭軍營會同該撫

將遵義大定之賊妥籌剿洗疏通省路該臬司即可設法入省妥爲查辦以副委任嚴樹森所陳黔事以選大將審地勢扼要津除巨逆籌協撥衛餉源六大端爲目前要務實爲動中肯綮覓在黔省上游旣責之劉嶽昭下游貴東軍務並責之李瀚章兆琛自可毋庸另派大員督辦卽著該撫藩等將嚴樹森所陳六條及另摺查明黔省賊情盡心籌畫總期平一股再辦一股以冀次第廓清毋爲賊所牽掣嚴樹森見赴劉嶽昭軍營正可將所陳黔事辦法及上游賊勢與該撫妥商辦理席寶田前經賞假省親見計假期已滿嚴樹森請令統帶舊部由水路取道荆宜施利以達重慶赴遵義進取以期上下游合力夾擊所籌亦妥該臬司所部業已遣散著李瀚章迅撥數營交其統帶迅赴遵義毋稍延緩所需餉項不敷銀二萬兩並著崇實駱秉章李瀚章妥籌協撥其軍火器械

並由崇實駱秉章就近解濟母任缺乏將此由六百里諭知崇實駱秉章李瀚章劉嶽昭並傳諭兆琛嚴樹森知之○陝甘總督楊岳斌奏各軍會剿陝西竄匪連獲大勝得旨該逆見竄平涼隆德一帶著楊岳斌嚴檄各軍分投截剿迅殲醜類毋令回犯陝疆○庚午諭內閣予告大學士祁寯藻學粹品端忠清亮直由翰林入直南書房洊擢正卿贊畫樞務簡任綸扉總理部務疊受先朝知遇之隆克愼克勤無忝厥職咸豐四年間以樞務積勞因病開缺朕御極之初蒙兩宮皇太后簡用耆臣重加倚畀以大學士銜補授禮部尚書命在弘德殿授讀朝夕納誨啟沃深資旋復因病予告在家食俸老成碩望中外咸知方冀頤養安和遐齡久享遽聞溘逝悼惜良深著賞給陀羅經被派鍾郡王帶領侍衛十員卽日前往奠醑加恩晉贈太保照大學士例賜卹入祀賢良祠任

內一切處分悉予開復應得卹典該衙門察例具奏靈柩回籍時並著沿途地方官妥爲照料伊子翰林院編修祁世長著俟服闋後以翰林院侍讀候補伊孫祁友愼著賞給舉人准其一體會試用示朝廷篤念耆臣至意尋予祭葬諡文端○諭軍機大臣等訥爾濟奏阜康縣城失守古城奇台一帶民勇潰散請飭催蒙兵進剿一摺阜康縣地方前經佐領百喜率同民勇駐紮與賊接仗疊次獲勝半載無事茲復於六月二十九日被烏魯木齊大股賊匪攻撲營盤以致潰敗阜康縣城又復失守陣亡馬兵民勇著訥爾濟查明請卹縣丞陶珙本係應行正法之員輒敢擅署奇台縣知縣復因濟木薩民勇潰散帶印潛逃實屬罪無可追著訥爾濟卽行查拏就地正法以昭炯戒佐領百喜擅委陶珙署理奇台縣印務此次接仗又不能得力著卽革職並革去軍功花翎仍畱營效

力以觀後效見在民勇新挫古城奇台一帶均屬空虛深恐該逆乘勢東趨亟應籌兵進剿李雲麟所調蒙兵計可陸續到齊著卽整理西進由奇古一帶節節掃蕩遏絕寇氛先保東路完善之區然後相機進取以戰爲守力冀挽回全局巴里坤城守緊要訥爾濟仍當督率兵民嚴密設防毋稍疏失將此由六百里各諭令知之○諭景紋奏查辦披布構兵一案完結地方肅清請飭四川撥銀各摺片披楞與布魯克巴連兵構釁震及後藏邊陲經景紋親赴定日帕克里等處令噶布倫白瑪結布責成松追呼畢勒罕等赴薩海營盤多方開導令其先行撤兵並令布魯克巴交出礮位轉付薩海仍捐辦犒兵牛羊租田價銀俾兩造釋怨息兵見在地方照常安靜辦理尙屬妥協惟披楞性多陰險難保日後不復起爭端所有善後及一切防堵事宜景紋仍當隨時認真經理並嚴

飭該商上暗修武備以備不虞不可稍涉大意至藏中用兵日久前次出師瞻對給發兵丁錢糧軍火並撫卹陣亡番官頭目家屬各款共用銀三十餘萬兩均由商上墊辦見經達賴喇嘛認捐十五萬兩所餘虧項尙多著崇實駱秉章由川省籌撥銀數萬兩派員解赴景紋處交納以資彌補事關極邊要需毋稍推諉將此由五百里各諭令知之○賞五城貧民棉衣銀並復棲流所實銀經費著爲令○予江蘇陣亡總兵官黃金友副將覃連陞遊擊崑祿建祠○辛未諭軍機大臣等勞崇光奏官軍進剿鎮雄逆匪攻破賊巢生擒首匪並永善縣屬敘匪滋事旋即撲滅各一摺此次署藩司岑毓英督率官軍進攻鎮雄逆匪連破磺磺山等處老巢見在圍攻磺子山旦夕可下首逆譚聯發等亦被擒獲辦理甚爲奮勉殊堪嘉尙惟李開甲爲著名首犯所稱死於亂軍之中未可憑

信儻任其脫逃別經句結爲患不可勝言著勞崇光嚴飭岑毓英迅卽設法捕拏不准稍涉含混並將礦子山老巢卽日攻克毋稍延緩永善縣屬教匪膽敢聚眾滋事恃險抗拒該處文武卽行帶兵撲滅地方肅清功過尙足相抵應得處分著加恩寬免惟匪首喻洗明喻洗舉下落必須確切查明儻聽其竄逸則該地方文武各員仍難辭咎著勞崇光飭令嚴查如未殲斃務當弋獲以靖閭閻滇省被擾十餘年民生塗炭甚切繫懷見在規取杜逆機勢若何其餘已未肅清之處並同教名目及首逆姓名賊眾多寡盤踞巢穴均著勞崇光詳細訪查繪圖貼說呈覽以便隨時指示機宜用冀剋期廓清拯民水火將此由五百里諭令知之尋劉嶽昭奏謹將滇省情形繪圖貼說呈覽至迤西各屬踞匪查逆首杜義等踞楚雄府屬杜汶秀等踞大理府屬姚得勝等踞麗江府屬楊德

明等踞永昌府屬馬得中等踞順甯府屬約計各黨與尙有四萬
餘人報聞○諭英桂徐宗幹嚴緝會匪○子甘肅殉難知縣孟鍾
瀛訓導武濂祭葬世職○回逆陷雲南嵩明新興易門各州縣城
○子陣亡署知州潘允懷知縣賈丙南吏目馬兆奎祭葬世職○
追予故雲貴總督潘鐸建祠知府黃培林知縣瞿怡增訓導華嶸
等附祀○以甘肅鞏昌府城被匪襲陷旋即克復總督楊岳斌下
部議處革遊擊江成萬職仍畱營子總兵官傅先宗以提督簡放
餘升敘有差○壬申諭軍機大臣等李鶴年奏髮捻回擾豫疆由
周口旋省布置一摺賊匪由山東鄆鉅一帶回竄豫境陳畱通許
之閒俱有匪蹤該撫聞警由周口星夜回省派馬德昭一軍迎頭
截擊小有斬擒該逆向南奔竄賊蹤剽疾異常此摺被竄是其慣
技亟應設法兜圍杜該逆紛擾之路著李鶴年慎遵前旨檄飭馬

德昭宋慶等軍與蔣希夷等軍會合夾擊惟豫軍尙嫌單薄必須與湘淮諸軍聯絡聲援會籌進剿方可爲一鼓聚殲之計著該撫咨商曾國藩相機布置務將該逆就地殲除毋令再肆蔓延將此由五百里諭令知之○諭張凱嵩奏官軍擣破山澤老巢餘逆困踞孫逆住屋見在圍攻一摺孫逆盤踞山澤經張凱嵩親督各軍分路力剿七月十八日以後連克村壘踏平賊營多座八月十五日夜間遂克山澤老巢生擒孫逆之父及其弟姪並逆目等四百五十餘人解營正法辦理極爲得手餘匪約計千人退踞孫逆住屋猶爲困獸之鬪自不必專事仰攻致傷精銳仍著該撫設計擒渠毋令死灰復燃致有竄突此股逆首殲除其餘零星小股已成破竹之勢並著分兵剿辦將南太一帶次第廓清以副委任將此由五百里諭令知之○飭瑞麟等補解廣西欠餉○兵部奏遵議

甘肅提督曹克忠處分應照擅離汛守革職私罪例革職得旨著
加恩改爲革職畱任仍著迅赴甘肅省垣毋得任意逗畱再干咎
戾○成都將軍崇實等奏攻剿越嶺夷匪疊獲勝仗得旨越嶺夷
匪先剿後撫允合機宜務期一勞永逸綏靖邊圉○癸酉諭軍機
大臣等瑞麟蔣益澧奏籌辦西江土客械鬪添兵扼堵一摺瑞麟
等前飭徐文秀帶兵赴那吉辦理客匪剿撫事宜旋據客匪鄭士
謙黃渙漳韓端沅等先後到營求撫該將等令其繳械造冊聽候
安插兩次繳來洋槍長矛均屬零星抵塞肇羅道王澍由恩平到
營將黃渙漳等扣畱仍傳令大小客眾頭目速繳軍械捆送土匪
探聞那吉等處匪類紛紛退聚沙岡青灣等處意圖外竄該督撫
已飭鄭紹忠扼堵並飭王澍往大田布置令梅啟照等帶新練礮
隊兵勇一同馳往恩平策應所籌均妥著卽督飭梅啟照會同徐

文秀等察看匪情相機辦理如該匪眾膽敢抗拒抑或潛圖負隅自不能不乘勢搜剿設使真心悔罪繳械輸誠該督撫仍當體朝廷好生之心妥爲籌畫安置男婦數萬人亦斷無盡殺之理惟當將著名巨魁訪獲正法使各匪知所畏懼卽土民中有兇悍素著者亦宜酌量辦理以後方可永遠相安不至再有彼此欺凌之事諒該督撫必能持平妥辦也另片奏據法國教士文鐸德赴營聲稱客匪中有奉教者一千五百餘人請分別安置該督撫令其查明確數造冊不准攜帶尺寸軍械分作數次帶赴軍營按名點驗押送恩平新會兩縣暫住不必帶領到省辦理亦甚妥協卽著籌資分起安插毋令聚於一處致貽後患將此由六百里各諭令知之○乙亥曾國藩奏宋慶一軍在刁河被圍劉松山等於七月十四日拔隊馳援行抵南陽探知豫軍業已解圍該逆向東南竄過

瓦店一帶二十一日劉松山等行抵灃灘與宋慶晤商會剿之策是時賊方攻破南陽之尹家寨屯聚各村劉松山與宋慶張詩日等軍議定三路進兵行二里許步賊大隊分路撲進馬賊從兩旁包鈔勢甚猖獗我軍迎戰賊遂退守尹家寨爲負隅死拒之計劉松山揮眾猛攻一鼓下之各軍跟追二十餘里至桑莊寨將賊踞村莊四十五處悉數奪回該逆大潰直奔侯橋寨一路共計斃賊千餘人解散脅從甚夥二十二日整隊進抵侯橋寨賊隊蟻聚對河相距四五里各軍商定仍分中左右三路而於中右兩路又各分中左右三路回環策應蟬聯而進由河之南轉折向東追至新野所屬之上仙岡賊股愈出愈多劉松山見賊挾全勢來抗嚴飭各營屹立穩持槍礮步步轟擊未幾馬賊漸包漸近而中路賊勢尤厚先以大股衝撲中路之右經彭秀清羅朝雲率兩營抵住該

逆卽直撲中路之左我軍當中路之左者爲同知朱式雲督率星
豫三營施放噴筒步賊稍卻而馬賊又從星左營後盤旋而入步
賊於煙燄中持矛衝突我軍以短兵鏖戰一以當十血戰半時之
久星左營受敵最久幾不能支朱式雲持刀躍馬往來督陣賊勢
漸靡劉松山張詩日約同宋慶等率隊猛擊立斃悍賊六七百名
合軍追殺十餘里遂收隊至上仙岡暫息是日計殺斃生擒及解
散者不下三千名臣查張牛二逆前經劉松山張詩日兩軍敗之
於上蔡等處茲又追及南陽之尹家寨新野之上仙岡奮勇鏖戰
雖殺賊不及前此之多而賊勢之悍臨陣之猛亦近所罕見劉松
山等聞豫軍被圍卽日馳援及解圍後卽與宋慶聯絡一氣同心
苦戰尤得師克在和之義容將出力各員附入上蔡案內彙獎其
陣亡之花翎都司鄒明立一員仰懇 天恩飭部照陣亡例議卹

又奏劉銘傳一軍於八月二十七日馳抵城武潘鼎新一軍於二十六日馳抵濟甯是時賊正磨聚鄆鉅之間閭敬銘派出之王成謙王正起兩軍三次進剿疊獲勝仗二十六至三十等日該逆猛撲運河之袁口靳口開河等處東軍抵禦嚴密未能搶渡其長溝以下之運防李昭慶一軍修築堅固又經潘鼎新一軍趕至濟甯軍威頗壯該逆未敢撲犯三十日劉銘傳潘鼎新會於汶上境內之馬村探知賊俱盤踞梁山前後九月初一日劉銘傳潘鼎新兩軍分道直薄梁山賊之馬隊由東至西包鈔而來張景春烏爾圖那遜督馬隊迎剿劉盛藻唐殿魁率步軍繼進陣斬悍賊數十名馬賊敗走其另股步賊三千餘名馬賊數百人自北而南正與潘鼎新一軍相遇潘鼎琛余在榜等施放炸礮潘鼎立率隊從旁鈔擊賊卽轉向西奔我軍三面齊進該逆盡向王莊奪路竄走烏爾

圖那遜追至王莊徑入賊隊手斬馬賊身受矛傷五處猶不稍卻經張佩之率隊衝進救護回營北路劉盛藻唐殿魁從後追到南路潘鼎琛等攔頭擊之賊遂悉數狂奔我軍追至二十餘里殲賊無算次日賊向南回竄劉銘傳潘鼎新兩軍併力緊追在鄆城荷澤曹縣東明等處或一日一戰或一日再戰該逆被蹙窮急殺傷逃散甚多初八日潘鼎新一軍趕至杞縣接仗小勝劉銘傳一軍趕至睢州該二軍於兩旬之間往來一千六七百里縱橫追逐迄未停趾見在杞縣陳畱一帶籌備米糧仍卽跟蹤追剿此次賊鋒已挫其勢或可稍衰惟旣不得志於東必仍狂竄而西臣已檄令劉松山一軍由扶溝以北向前迎剿並檄鮑超一軍由南陽至南召魯山一帶遮截賊入洛陽之路如驅賊南趨鄂境當一面派兵與鄂軍合剿一面畱兵再辦沙賈兩河防守事宜冀收夾擊之效

又奏臣前因病請假蒙恩允准一月以來服藥調治外證全愈惟用心稍久輒復煩躁出汗耳聾亦時作時止九月初九日忽昏暈倒地雖旋卽無恙而衰頹之態實難支持據醫者云心氣過虧必須加意靜攝或可不再添病合無仰懇 天恩俯准續假一月在營調理至目下羣賊西竄淮軍湘軍豫軍鄂軍或剿或防徵調紛紛臣當與各督撫妥商調度雖在病中不敢稍涉大意 上諭軍機大臣等劉松山張詩日兩軍前因宋慶一軍被圍馳往南陽援救攻破尹家寨等處踞匪與宋慶所部在上仙岡合剿悉力鏖戰疊次獲勝殺斃悍賊甚多所有出力各員著曾國藩彙入上蔡案內保獎劉銘傳潘鼎新兩軍追賊至山東汶上境內將梁山之賊三面攻剿並在鄆城荷澤曹縣東明等處疊次獲勝盡力窮追至豫省睢杞一帶賊勢已挫著曾國藩檄飭劉銘傳等趕緊追剿務

乘該逆疲乏之餘窮其所向不令喘息並檄劉松山一軍由扶溝
以北向前迎剿一面催令鮑超由南陽至南召魯山前進截賊西
趨洛陽之路李鶴年亦當檄飭豫省諸軍前截後追與湘淮各軍
聯絡聲勢並著官文曾國荃分布鄂軍嚴防邊界仍另籌遊擊之
師出境迎擊與豫省各軍會合兜剿不可稍分畛域曾國荃卽行
出省擇要駐紮相機調度毋稍延緩沙賈兩河之防仍著曾國藩
李鶴年嚴密布置毋任賊蹤再行東竄另片奏病尙未痊請續行
給假等語曾國藩著再行賞假一箇月在營調理將此由六百里
各諭令知之○諭據何璟奏阜康官兵潰散巴里坤喫緊亟盼大
兵出關等語阜康爲巴城屏蔽失守後賊復竄至濟木薩巴里坤
存兵無多情形緊迫自係實情前因訥爾濟奏聞已諭令李雲麟
迅速進兵惟恐緩不濟急而成祿一軍疊諭剋期出關並令楊岳

斌酌派數營會同黃祖淦進攻肅州騰出成祿之軍卽日西征諄諄訓諭不啻三令五申至今尙無出關消息殊屬任意延玩著楊岳斌成祿懍遵前旨迅圖出關毋得藉詞耽延並著何瑄於大兵未到之先悉心布置毋令巴城稍有疏失以副朝廷超擢之恩將此由六百里諭知楊岳斌成祿並傳諭何瑄知之○諭戶部飭催各省欠解吉林軍餉○予廣東陣亡知府梁廷璽等祭葬世職○賞普濟堂功德林賑米五百石王恕園賑米三百石○丙子允左宗棠請建忠義祠於杭州祀湘楚各軍死事者○丁丑諭軍機大臣等楊岳斌奏布置東南兩路見擬回省籌辦軍食兼通西路糧運並請催曹克忠回甘成祿出關各摺片回匪分竄慶固一帶楊岳斌正在督軍勦辦乃因駐省各營糧食缺乏於九月初九日自帶親兵取道通渭晉省趕緊籌備軍食卽著該督於回省後妥爲

鎮撫籌畫軍糧以定人心毋任因飢譁潰致釀事端該督親飭雷正綰張在山等馬步各軍防剿竄陝之路又派彭楚漢等軍進紮隆德屬境以杜西奔令王德勝等往靜甯一路堵剿北路逆匪旁竄兼顧南路門戶並擬將省防各軍酌量抽調帶赴西路平番節節進剿疏通糧運卽著嚴飭各軍認真防剿不得任賊竄突致干重咎省垣爲根本重地必須布置妥協方可無內顧之憂楊岳斌此次回省必須熟思審處以期計出萬全毋蹈前轍逆眾見擾及固原慶陽兩屬誠恐復竄陝疆著劉蓉督飭防軍出境剿洗務期會合甘省兵勇盡力追剿毋任再有回竄曹克忠已屢有旨催令折回甘省見在已否啟行著劉蓉卽行咨催回任以重職守成祿屢經諭令出關何以尙未啟行肅州有黃祖淦一軍敷剿著成祿卽率所部出關會剿鶴齡一軍前已有旨遣撤所有川省應解鶴

齡軍餉楊岳斌添成一萬兩按月改解成祿軍營該提督既增營餉自可於關內添募數營用期厚集藉資得力該提督務當約束兵丁迅卽出關剿賊不得需索居民儻任意逗畱致有擾累等情必當治以應得之罪懷之將此由六百里各諭令知之○子甘肅陣亡參將陳復勝等祭葬世職○撥河南司庫銀五萬兩備上南應工需○戊寅諭軍機大臣等李鶴年奏髮捻各逆掘挖河隄經豫軍擊退一招逆匪被剿窮蹙竟於附近汴省一帶掘挖隄岸希圖竄越河北並將榮澤壩挖開二十餘丈水勢洶洶幾於汜濫經豫省水陸官軍擊退該逆蓄謀甚狡見雖折向南趨仍恐乘虛反噬河防關係南北大局甚重李鶴年務當督飭豫軍嚴密分布不可稍涉大意此次水陸官軍力戰數晝夜之久保護長隄尙屬奮勇著准其酌保數員以示鼓勵其南竄股匪並著曾國藩飭令湘

淮諸軍會合豫師跟蹤追擊毋令喘息一面嚴催鮑超之師迎頭探勦迅掃狂氛豫境黃河由廣武山以東至朱仙鎮綿長二百餘里均須鱗次設防豫省兵力未厚應如何辦理之處著曾國藩李鶴年統籌全局速行酌辦務臻妥協開濮東垣及張秋一帶爲畿南保障黃河隄岸劉長佑閻敬銘尤須加意嚴防應如何添撥水陸各營鱗次分布以臻周密著該督撫悉心妥籌毋稍貽誤榮澤壩隄岸雖經豫軍倉卒搶護而工未能堅著蘇廷魁趕緊修築堅固並將黑岡被掘河隄一併補修毋稍延誤將此由六百里各諭令知之○諭張亮基奏稱仁懷縣踞匪業經署知縣汪麗金率團剗平賊壘多座僅餘木城一帶未靖豬拱箐苗匪岑毓英已由滇屬鎮雄州進攻大定府境見已肅清黔西苗教各匪業經練眾擊潰並由該地方文武接勦連破賊壘五處請飭劉嶽昭改道安順

等處進剿等語大定黔西等處賊勢既衰本省兵練足敷剿辦自可毋庸借助鄰援其安順賊氛延蔓郎岱廳之各股仲苗號匪及盤踞興義府城之回匪勢均猖獗黔省餉絀兵單難於兼顧著劉嶽昭卽率勁旅由遵義馳赴安順興義郎岱一帶將各匪節節剿洗並將興義府城克復肅清黔省用竟全功劉嶽昭見在遵義所有仁懷縣屬木城一帶餘匪卽著該撫於啟程時先行剿除再行馳赴安順等處其黔西州餘匪卽著張亮基飭令該地方文武實力搜剿務須殄除淨盡毋畱餘孽豬拱箐苗匪仍著勞崇光督飭岑毓英越境攻剿不可稍分畛域西秀邊境卽著崇實駱秉章嚴密防堵將此由六百里各諭令知之○允戶部議飭各省月撥新疆協餉○予貴州陣亡署遊擊富謙祭葬世職○庚辰德州教匪趙熙沅等就擒○辛巳諭軍機大臣等閻敬銘奏捻股由豫突竄

東境攻撲運河經防軍擊退見仍盤踞河西並因病請假各摺片任住賴汶沆等逆由中牟一帶東竄每晝夜行二百數十里本月十九日回竄曹縣二十一日夜糾合大股進撲袁口經官軍擊退見在賊股仍踞河西著閻敬銘卽飭在防各軍乘該逆喘息未定痛加剿洗掃蕩狂氛賊謀狡詐往往注彼竄此亟肄罷我迫官軍悉數調往追逐而該逆卽伺我不備乘虛折回近日賊情大率類此此時賊蹤雖又東竄豫省布置仍未可稍形疏懈應如何調撥勁旅會同東省官軍通力合作迅圖聚殲之處著曾國藩李鶴年相機調度直隸東明長垣一帶河防又形喫緊著劉長佑督飭張樹聲統率所部嚴密布置遇賊卽擊毋令偷渡東省兵力甚單如該逆合股竄入勢恐不敷抵禦李鴻章移紮徐州距曹縣較近著卽酌撥兵勇迅赴山東協同進剿以資厚集閻敬銘患病未痊著

實假一箇月在營調理惟賊蹤見又東竄防剿正形喫緊該撫仍當力疾從公妥籌兼顧以副委任將此由六百里各諭令知之○諭穆圖善奏馳赴中衛進剿並陝回馬生彥等投誠一摺穆圖善行抵中衛地方回目馬瑞興卽馬生彥及楊汶治等遞稟乞撫該回等未受懲創遽爾乞降恐別有詭謀不可墮其術中如果真心悔罪卽當收繳馬匹軍械方能擇地分別安插穆圖善見擬由中衛趕緊馳回甯夏設法辦運口糧催調馬步仍由中衛進攻靖遠踞匪督師西下與楊岳斌聯絡聲勢並就近赴省均著照所請妥爲籌辦以副委任甯靈地方自應畱兵駐守以備不虞該將軍擬請令金順署理甯夏將軍並畱兵交其統帶令豐伸署理甯夏副都統兼管後路營務向來將軍副都統大員必須請旨派署該將軍率行委署實屬不諳體制惟念事關軍務地方姑如所請甯夏

將軍印務著金順暫行護理甯夏副都統印務著豐伸暫行護理
仍飭該員等悉力籌防毋稍大意甘肅前派援陝之程興烈一軍
著准其調回甘回前竄陝疆雖被擊退難保不再圖滋擾喬松年
見已啟程赴陝劉蓉於陝西情形較熟呼應亦靈仍著暫督諸軍
嚴防邊隘如能出境會剿更可得力喬松年到後仍須妥爲商辦
未可置身事外致賊匪乘隙竄回又形棘手穆圖善另片奏請留
景廉襄辦文案等語景廉已授哈密幫辦大臣哈密新克需人駐
守著卽飭令景廉前赴新任軍營文案另行派員辦理其駐紮花
馬池之直晉官兵卽派營總富勒琿接帶督令嚴密防守不得稍
涉疏忽將此由六百里各諭令知之○諭劉長佑等迅解吉林欠
餉○飭催川粵等省協解黔餉○癸未諭軍機大臣等左宗棠奏
籌議變通閩浙兵制一摺閩省綠營兵制額冗餉薄素不訓練臨

事不能收一戰之功並不能爲一日之守據左宗棠所陳積弊情形實屬洞中窾要該督見擬將無用之兵汰除四成卽以裁兵之餉加給存營之兵併營抽練所籌甚爲切當著卽照所議辦理並著督飭水陸各營認真訓練務當切實講求不可有名無實左宗棠啟程在卽所有未盡事宜並著英桂吳棠徐宗幹悉心籌畫俾臻妥善總期兵歸實用餉不虛糜毋蹈仍前積習浙省兵丁議復常制止須少募新兵精練汰存舊兵卽著左宗棠英桂吳棠與馬新貽黃少春將一切事宜妥爲籌議責成楊昌濬專主其實力辦理水師船礮尤宜講求堅利閩省購造粵東花翎船隻亦當力求堅固不可以敝窳充數左宗棠前奏閩省設廠製造輪船尤爲水師要務卽著吳棠接辦不可日久廢弛將此由五百里各諭令知之○吉林將軍富明阿奏改期攜篆啟程復派官弁往查老金

場安插私墾游民乞金流民得旨乞金流民究應如何安插必須熟籌辦法該將軍歷次陳奏但云勒限遣散而於安插之地並未籌及實屬顛預仍著悉心籌畫或卽准令在金場附近開墾或另擇空閒地方耕種度日俾得各安生業仍設法彈壓稽查以爲一勞永逸之計儻或冒昧從事致將來別滋事端必惟該將軍是問○追予故漕運總督王夢齡建祠○乙酉以孟冬時享 太廟上前期親詣行禮○是月蠲免福建龍巖等十三州縣邵軍同知溪口州同仁壽麻沙縣丞所屬被擾額賦浙江新昌等十六縣同治二年未完額賦錢塘仁和兩縣義冢地畝額賦緩徵山西臨汾縣咸豐十年未完額賦

冬十月丁亥欽奉 慈安皇太后 慈禧皇太后懿旨前因侍郎李鴻藻丁憂後兩次懇請終制當經降旨慰留並准其二十七箇

月內不穿朝服不與朝會筵宴以示體恤嗣復派恭親王等赴該
侍郎寓次傳旨令於百日後照常入直母得再行固辭旋據李鴻
藻奏稱百日將滿愁急萬分心疾恐致增劇請曲予矜全等語情
詞懇切深用惻然昨據御史張觀鈞奏稱賢臣不宜久離請旨敦
促並歷陳該侍郎宜出任事各條頗爲詳盡李鴻藻受恩至重與
國家有休戚相關之誼當此聖學日新軍務方亟該侍郎豈能恣
然於懷著卽於百日後仍遵前旨照常入直弘德殿軍機處以副
委任俟將來扶柩回籍時仍當寬予假期俾得從容料理則忠孝
兩全可無遺憾該侍郎務當仰體朝廷曲成之意母得再行籲請
○飭四川山西補解甘肅協餉○以杜聯爲內閣學士由少詹事遷○
戊子諭軍機大臣等閻敬銘奏髮捻攻撲河牆經防軍擊退見籌
防剿情形趙長齡奏豫捻西竄晉防喫緊請飭河南派兵截剿各

一摺髮捻麇集河西猛撲袁口旋由南路劉老口折而東南突攻開河圩牆經防軍轟擊遂由安山戴廟等處以擾長溝官軍迎剿疊有斬擒賊股見遁嘉祥之羊山一帶逆蹤或南或北飄忽靡定其搶渡奪路專在黑夜蓄謀尤爲詭譎亟應嚴密布置力堵該逆紛擾之路潘鼎新劉銘傳等軍業已次第入東著閻敬銘檄飭東省官軍與調到援軍聯絡聲勢晝夜嚴防遇賊卽擊迅埽逆氛閻敬銘奏據獲賊供稱該逆因在豫無從覓食拌死東竄如此路防守甚密卽將改竄韓莊臺莊及清淮一帶圖撲運東等語著吳棠與李鴻章悉心會商妥籌戰守與東豫各軍合力會剿張之萬計已抵淮卽著趕緊任事將清淮防務妥爲接辦趙長齡奏張總愚賴汶沆各率大股復由曹單竄豫併力西趨已至永甯縣之河底鎮其邊馬擾及新安縣之磁礮陝州之硤石驛等處等語前據李

鶴年奏賊由中牟撲犯河干掘挖隄岸並將滎澤壩挖開二十餘丈當經官軍擊退等情陝州之匪是否卽係此股著曾國藩李鶴年探明賊蹤相機迎剿逆氛既經西竄晉防極爲喫緊亟應力圖捍禦卽著照趙長齡所籌督同臬司陳湜添調兵勇嚴爲備禦節節設防毋令偷渡豫省西路空虛若該逆於陝州等處盤踞日久將來黃河結凍成橋晉省防不勝防更恐該逆分犯靈寶閿鄉偃近潼關全陝亦爲震動著曾國藩李鶴年抽撥勁旅迅赴陝州一帶繞前截擊力杜該逆西竄之謀鮑超一軍見在魯山應否卽令該提督移紮陝州一帶專顧西路之處著曾國藩李鶴年相機調度曾國藩節制數省責無旁貸務當統籌防剿力顧全局以副委任將此由六百里各諭令知之○諭李雲麟奏烏城蒙兵起營日期並派員統帶前進請飭後路統兵大員迅速會剿並由蒙古各

部落酌捐駝馬牛羊開單呈覽一摺賽因諾顏等處兵丁見已起營烏城兵一千八百名擬派達什拉布坦統帶李雲麟欲於九月底趕至察罕通古布置請飭德興阿趕緊由歸化城督率馬步各軍取道大西路馳越古城會剿並催成祿卽日出關著德興阿成祿懷遵疊次諭旨星速前進以成三路會兵之局不得再事遲延坐失事機李雲麟亦卽統率各軍認真整頓相機進剿以副委任迪境秋糧盡爲賊據李雲麟請由蒙古各部落酌捐駝馬牛羊錦丕勒多爾濟因該部落征兵一千八百名數月口糧無著自請督同西兩盟王公札薩克等竭力捐輸備辦其急公之忱深堪嘉尙卽著該參贊會同麟興總理四盟捐輸事宜俟德勒克多爾濟到任後再由該將軍督同辦理科布多各旗蒙兵亦可照此辦理著奎昌明瑤仿照烏城勸捐之法一體遵辦不得稍涉推諉東兩盟

見在並未派出征兵且旗分較多戶口較眾若與西盟捐輸數目相等不足以昭平允著文盛阿爾塔什達查照西兩盟報捐數目加倍派辦其所捐牛羊卽解赴李雲麟軍營專備吉林黑龍江察哈爾伊克昭官兵食用塔城兵食無資著俟李雲麟進兵後遣員赴土爾扈特親王處令其督率各旗接濟以贖前愆蒙古以連年窮困之餘尙能力助軍餉與尋常例捐不同李雲麟請照尋常捐輸酌量加優之處著戶部理藩院妥速議奏其捐輸事宜卽照單開章程辦理另片奏據慶愛咨報吉林征兵均已到口請催前進著福興迅將駝隻等件備齊催令該營總等剋期由大西路前進務於十一月內趕至古城以資教練其餘各項征兵亦卽飭令隨後續進又奏請催阿克敦布赴營畱巴霞等差委二片阿克敦布一員著福興催令啟程不准藉詞推諉巴霞巴彥圖陶珙三員均

獲咎甚重李雲麟請畱營差委姑如所請責令立功贖罪儻始終不能奮勉仍遵前旨卽行正法毋稍寬貸又片奏寄存伊犁餉銀十九萬兩以斜米之十一萬提回以喀帕爾之八萬兩歸榮全動用除前經解回九千兩外迄今兩月渺無音信總由科屬之昌吉斯台卡倫並不代遞公文請飭總理各國事務衙門照會俄使由庫倫轉遞至斜米管事官處方無貽誤等語著該衙門照所請迅速妥辦毋任再有延誤將此由六百里各諭令知之○飭河南山東山西迅解新疆軍餉○庚寅廣江西九江府學額二名湖口縣三名四川簡眉邛瀘崇慶德陽銅梁榮達三臺蓬溪樂山宜賓富順各一名○辛卯命劉長佑嚴覈畿輔兵額○癸巳諭軍機大臣等趙長齡奏捻竄陝州撲河搶渡經水陸各軍擊退一摺張總愚等各率大股乘虛西竄由陝州硤石驛竄至八里店等處距茅津

不過二三十里九月二十六七等日在太陽渡對岸麇集河干勢將搶渡經臬司陳湜等督率水陸各軍施放連環槍礮隔岸轟擊斃賊多名水師礮船亦相繼趕到協同堵擊賊始由閿鄉盤陀一帶漸向西路遁去勢將犯陝潼關商雒等處無重兵扼守著喬松年劉蓉速撥勁旅迎頭攔截毋任闖入腹地喬松年計可到陝地方情形恐未熟悉劉蓉仍當會商防剿或出省扼要駐紮不得遽行抽身引退儻新舊交替之際稍有疏虞仍惟劉蓉是問內鄉淅川等處防兵甚稀著李鶴年飛催大兵繞前遏剿前諭曾國藩調鮑超防陝州一路未知該提督曾否與賊相遇如尙在魯山南召正可移師南陽以防淅川一帶著卽相機調派以期力挫兇鋒該逆竄豫無從覓食恐仍垂涎山西完善之地稍爲鬆勁卽恐回竄墮其狡謀趙長齡務當督率陳湜等晝夜隄防不可稍涉大意如

晉省邊防喫緊恐非陳湜一人所能兼顧卽著趙長齡隨時確探
出省督辦上年冬閒防河山東山西均雇覓小船敲冰最爲得力
該二省沿河雖有礮船尙恐不敷調遣仍應照上年辦法多雇民
船輪織敲冰以防逆匪偷渡著閻敬銘趙長齡妥爲籌辦閻敬銘
前奏賊眾在曹屬一帶南趨究係何股見竄何處著將近日軍情
賊情確查具奏並隨時與曾國藩李鴻章等咨商辦法以臻周密
將此由六百里各諭令知之○予福建被戕主事林其年陣亡遊
擊郭立本等祭葬世職○乙未諭內閣閻敬銘奏肥城縣匪徒滋
事督兵剿滅一摺山東肥城縣屬黃崖山匪首張積中竟敢勾結
匪徒糾黨謀逆經閻敬銘親督兵勇馳往剿辦分路攻入山口將
該逆各寨立時平毀殲除匪黨一千六七百名墜巖落溝者無算
匪首張積中及其子張紹陵均舉火自焚辦理迅速甚屬可嘉聞

敬銘著加恩賞還二品頂帶其尤爲出力之知府王成謙著免補知府以道員儘先補用並賞加按察使銜其餘出力員弁准其擇尤保奏毋許冒濫另片奏請將知府吳載勳革職治罪其張紹陵世職可否另襲等語吳載勳與逆首張積中戚屬向與同居黃崖山內雖無通匪實據惟事前既不舉發又於委員前往查拏之時以張積中業已他往誑言相告實屬有意庇護僅予發往軍臺不足蔽辜吳載勳著卽革職永不敘用並發往黑龍江充當苦差張積功之繼子張紹陵隨從本生父張積中爲逆與別項劣蹟迥異其所襲雲騎尉世職著不准其另支承襲○諭軍機大臣等閭敬銘奏肥城縣屬黃崖山匪徒滋事督兵圍剿殲滅一摺覽奏甚爲欣慰匪首張積中以職官踞寨叛逆勾結黨與甚眾該地方文武員弁平日漫無覺察實難辭咎此次該撫督兵剿辦尙屬迅速第

恐餘黨伏匿仍思勾結滋蔓斷不可含混了事致令餘燼復然閩
敬銘回東平後卽著責成藩司丁寶楨認真搜捕毋畱餘孽此外
有無潛伏未發之匪徒並著該撫嚴飭各屬隨時畱心查辦以靖
閭閻儻有諱飾不報者卽著隨時嚴參毋許稍有徇隱將此由四
百里諭令知之○丙申諭軍機大臣等英桂徐宗幹奏閩省紳民
懇畱督臣暫緩西行一摺據該紳民等呈稱聞左宗棠調補甘肅
之命惶然如失所恃並以剗造輪船一事機不可失如使總督暫
駐閩中豫將赴甘之師先行部署俟外國工匠畢集剗造一有端
緒卽移節西征旣省待兵待餉之期又無顧此失彼之慮等語所
陳不爲無見朝廷亦知輪船事屬剗始有治法必有治人方臻周
妥無如關隴數千里之地賊眾兵疲民生日蹙若不亟籌得力大
員統師前往誠恐蔓延腹地爲患益深是以令左宗棠移節西陲

爲地擇人實非得已今據沈葆楨等所呈各節亦屬切要之圖英桂尙未接印著左宗棠暫緩交卸督篆剋日催督工匠上緊製造妥定章程與英桂沈葆楨會商辦理並將西征兵將豫爲部署該省協餉原皆有著之款惟增兵仍須增餉該督如有所見不防據實敷陳以備採擇前已有旨授劉典甘肅臬司爲其與該督相習可收指臂之助著該督卽行檄催劉典先行赴任並將兵將酌撥數營交劉典管帶令其迅速入甘該督俟吳棠到任後再行交卸來京輪船辦有端倪卽交英桂吳棠沈葆楨認真經理沈葆楨見旣在籍於此等緊要事件未可視同膜外卽著幫同該省督撫等悉心區畫以期周密將此由五百里各諭令知之○河南巡撫李鶴年奏賊蹤分竄提督鮑超等軍分投緊躡得旨該逆避實擣虛鮑超此番閒道出奇當可制勝該撫卽咨行鮑超妥速進剿並豫

計該逆必由之路伏兵待之可期得手仍隨時與曾國藩會商辦理確探各路軍情賊情迅速具奏○丁酉李鴻章奏臣於十月初三日行抵徐城據徐州鎮道面稟初二日賊騎先由金鄉竄至豐縣是日大股南趨離徐百數十里臣卽將隨帶親兵三營並李昭慶留徐四營分布城廂嚴爲守禦惟據劉銘傳擒獲賊供任賴等逆竄東旣不得逞仍圖竄擾淮徐窺撲運河臣在徐州尙可力扼要衝但恐該逆避兵擾竄雖宿泗靈處處空虛已檄調南贛鎮總兵王永勝統開字十一營進紮皖徐交界之雙溝古州鎮總兵劉士奇統奇字七營進紮運河西岸舊邳州捻眾若卽東竄卽會合該二軍迎頭兜剿內可屏蔽清淮以東各州縣外可與劉銘傳李昭慶等軍前後夾擊又添調水師分扼運河上下使無旁逸之患臣仍隨時會商曾國藩妥爲調度以期迅滅賊氛得旨昨據李鶴

年奏該逆東股分竄金鄉西股由陝州折竄靈寶已諭令鮑超將西路之匪跟蹤追擊其東路賊股該署督飭將弁妥籌防剿與留國藩隨時會商相機調度以期迅掃逆氛○戊戌諭軍機大臣等前因閩省設厰製造輪船事關緊要特經諭令吳棠接辦復經諭令左宗棠將輪船事務辦有端倪交英桂吳棠沈葆楨等經理茲據左宗棠奏請派重臣總理船政接管局務一摺該督以輪船事在必行不以去閩在邇遽行閤置實屬沈毅有爲能見其大著遵奉前旨將設局造船事宜辦有眉目再行交卸啟程沈葆楨辦事素來認真人亦公正廉明見雖守制家居惟事關船政大局必須經理得人該前撫務當遵奉前旨出而任事不可稍行諉卸所有船政事務卽著該前撫總司其事並准其專摺奏事先刻木質關防印用以昭信守一俟局務辦成再行奏請部頒關防一切應辦

事宜並需用經費均著英桂吳棠徐宗幹妥爲經理仍隨時與沈葆楨會商不可稍有延誤道員胡光墉卽著交沈葆楨差遣左宗棠另奏請令劉典幫辦甘肅軍務本日已明降諭旨照所請行前因劉典係丁憂人員是以降旨令該員署理甘肅按察使見在該員是否服闋並著左宗棠查明具奏將此由六百里各諭令知之○諭前因甘肅軍務緊要特授左宗棠爲陝甘總督並諭令將西征兵將豫爲部署檄催甘肅臬司劉典先行赴任酌撥數營交劉典管帶令其迅速入甘茲據左宗棠奏稱該督與劉典共事最久相知最深請飭迅速赴任以資贊助等語著李瀚章傳知劉典卽行銷假啟程赴任一面聽候左宗棠調撥兵將統帶入甘該員受朝廷厚恩當思竭力圖報不得藉詞遷延致負期望將此由六百里諭令知之○湖北巡撫曾國荃奏出省擇要駐紮得旨賊蹤分

合靡定南陽一帶空虛該撫務當確探賊情相機進紮並檄飭郭松林一軍越境會剿仍隨時與曾國藩咨商調度毋得顧此失彼致滋蔓延○命署甘肅按察使劉典幫辦陝甘總督左宗棠軍務○已亥劉蓉奏據潼商道稟報山東曹州捻匪已竄陝州邊馬擾至閿鄉西關距潼關僅六十里當飭各軍扼要防剿該逆偵知潼關有備折由蒿峪小路分股竄入華陰朝邑等處雒南一路又有賊馬滋擾並聞張逆有由魯山竄擾漢中之說臣查捻逆在山東河南疊被官軍截剿早料其鋌而走險必圖偪入陝疆見在該逆大股分路狂竄潼關以西平原路歧無險可扼若不厚集兵力深虞難遏兇鋒臣已抽調邱時成等馬步各隊暫赴省東以顧眉急合無籲懇 天恩飭浙江提臣鮑超親督所部分由潼商前進與陝軍合力迎擊迅圖掃蕩並請飭下河南撫臣李鶴年派撥勁旅

扼紮陝州要隘以期前後夾擊至襄陽鄖陽一帶均與陝境毗連並懇飭下湖廣督臣官文湖北撫臣曾國荃派兵嚴備力固鄂邊山西撫臣趙長齡布置風陵渡上至龍門一帶河防以免偷渡晉境又奏臣所部楚軍共止一萬四千餘人從前東西分防早已不敷布置見值西回東捻兩路同竄欲防則無迎擊之旅欲剿則無守隘之兵竭蹶萬分不得已請調鮑超一軍萬一該提督又爲魯山一股牽掣未能整軍前來恐局勢糜爛不可支持伏懇飭下兩江督臣曾國藩通籌全局迅撥大枝勁旅來陝會剿 上諭軍機大臣等劉蓉奏捻回兩路擾陝請飭曾國藩撥兵赴援各摺片覽奏曷勝焦急捻匪由靈寶閿鄉西趨折由蒿峪小路分股竄入華陰朝邑等處雒南一路又有馬賊滋擾陝省東北東南兩路均有賊蹤逆首張總愚又有欲由魯山竄擾漢中之說甘省回匪大股

已踞涇州北原分股竄至甯州所屬地方宜君白水三水各邑均有逆回潰勇紛擾邊境陝省東西兩面同時喫緊該省兵力本單彭體道之師又在華陰被挫若不厚集兵力痛加勦洗恐賊勢益成燎原劉蓉見抽調邱時成等各隊暫赴省東著卽激勵諸軍奮勇堵剿力遏兇鋒商雒一帶仍籌防軍妥爲遏截省垣防務緊要務須嚴密布置不可稍涉大意鮑超一軍卽著曾國藩迅速催令入關助剿並趕緊添派湘楚各軍赴援陝境陝州洛陽一帶李鶴年當分撥豫軍堵截以防賊蹤回竄襄鄖一帶官文曾國荃亦宜迅撥兵勇扼要駐守以防賊由商雒回竄鄂疆之路並著相機出境越剿不可盡疆自守同州朝邑一帶與晉省僅隔一水黃河隄岸綿長防務尤關緊要趙長齡當抽撥兵勇交陳湜妥籌堵禦毋稍鬆懈僅任令賊匪東渡黃河惟趙長齡陳湜是問漢中一帶毗

連川境著崇實駱秉章迅卽挑派得力兵將嚴防邊境毋令闖入至曾國藩總統師干身膺闔寄各路將士均歸調度從未籌及陝洛防務辦理一載有餘賊勢益形蔓延見在關中又復被擾大局糜爛至此不知該督何顏以對朝廷若再不速籌援師赴陝將此股捻匪設法殄滅淨盡則始終貽誤咎將誰歸陝省西路回匪見俱麕聚甘境楊岳斌當飛檄省東各軍實力勦辦與陝省防軍兩面夾擊以期迅滅回氛儻任聽涇州踞逆竄入陝境毫無布置恐不能當此重咎也程興烈一軍著穆圖善飭令仍駐吳旗鎮防堵卹延毋庸調回甘省並著穆圖善抽撥甯靈防兵先顧陝省喬松年見在行抵何處著卽趕緊馳赴新任妥籌防勦劉蓉俟喬松年到任後仍當與之會辦軍務不得遽行回籍置身事外劉蓉另摺奏查明譚玉龍等所部兵丁譁潰情形請將該革員等罪名寬免

等語譚玉龍欠發兵丁餉銀既無剋扣肥己情事且能深自引咎
屢著戰功尙知愧奮著撤去統領暫免治罪仍責令戴罪隨營自
效焦萬海一員既經屢次打仗出力業已革職著從寬免其置議
陳義一員仍著楊岳斌會商雷正綰查明覈辦將此由六百里各
諭令知之○諭張凱嵩奏移軍進剿鎮安太平土匪一摺鎮安地
接邊壤土匪徧地歷年未能剿辦見在山澤肅清自應移得勝之
師前往進剿該撫所籌歸併二十營以十六營取道隆安直趨鎮
安爲專剿之師以四營取道新甯進紮太平爲犄角之勢布置尙
爲妥協卽著飭令道員覃遠璉接統全軍迅速進剿務期搜捕淨
盡不准含糊了事儻有真心投誠者酌量收撫以解散其黨與則
辦理更易得手所有軍糧器械萬不可稍有缺乏並著張凱嵩妥
爲籌辦隨時接濟該逆被剿窮蹙必致紛竄卽著該撫嚴飭易元

秦等分投堵扼毋稍鬆懈將此由六百里諭令知之○飭催湖北四川山西等省撥解陝營軍餉○庚子諭內閣前因總理各國事務衙門奏請裁撤山海關監督改設道員專以旗員補放地方如何管轄請飭盛京將軍奉天府尹三口通商大臣妥議當經降旨依議嗣據該將軍等體察情形覆奏復降旨令該部速議茲據吏部等衙門奏稱請將沿海之金州廳岫巖城復州海城蓋平縣地方官員及所屬佐雜悉歸新設道員管轄並於奉天省候補雜職內揀派二員交該道差委卽於營口直班其餘各府州縣遇有中外交涉稅務事件由該道檄飭遵辦金州廳等處錢穀刑名事件統歸督催稽查其命盜等案解勘仍照舊例辦理蓋州城守尉牛莊防守尉二員毋庸歸該道節制如有需兵稽查勦捕之處准其移行該城守尉調撥該口所收常洋各稅應令該道每月詳報

三口通商大臣由該大臣分咨查覈奏報其徵收稅項仍遵舊定關期辦理毋庸按照經徵代徵在任月日覈計以杜牽混山海關所轄水旱馬頭共三十餘處仍令照則徵收無論直隸奉天等處口岸均由該道覈實稽徵除金州廳等處地方歸該道管轄外並將監督原管之海口一併歸其管理海城蓋平二縣仍照舊輪往營口住班儻遇中外交涉關繫緊要事件准該道專摺奏聞其尋常地方稅務等事仍分詳將軍府尹三口通商大臣覈辦其鑄發關防廉俸薪水建蓋衙署等事所籌均屬周妥卽著照所請行所有新設之分巡奉天錦州山海關等處兵備道員缺著江西廣饒九南道俊達調補俊達未到任以前著前監督成林署理惟改設之初諸事枹始該將軍府尹三口通商大臣等當督同該道將一切事宜規畫盡善餘著照所議辦理○給事中徵麟奏保道員桂

昌請發往甘肅差委允之仍諭科道官嗣後不得濫行保薦○辛丑欽奉 慈安皇太后 慈禧皇太后懿旨本日據李鴻藻奏見屆百日已滿自揣病軀實難入直懇恩矜全一摺侍郎李鴻藻自丁母憂屢經降旨慰畱令其照常入直弘德殿軍機處以副委任茲復據奏稱數月以來哀迫憂煎精神恍惚時發心跳氣壅之證非安心調養恐成怔忡藥餌難以奏效等語覽其所奏止以病軀難於入直尙非拘執終制陳說李鴻藻著加恩賞假調理方今皇帝春秋正富典學方殷軍務未竣四方多事該侍郎受國厚恩具有天良自當於病痊時照常入直竭力圖報諒不始終固執也○諭軍機大臣等富明阿等奏遵旨安插挖金流民並私墾浮民情願認領輪租辦理善後章程出省巡哨各摺片金場流民經富明阿等飭令那斯洪阿等前往開導該頭目業已來省先行繳械俟

河冰凍結依限全數移出改業歸農卽著富明阿等督飭委員會同該總目韓見琮等屆限剴切開導移出金場妥爲安插富明阿以此項金夫無業可歸擬將葳沙河毗連色勒河以下穆奇河漂河樺皮甸子等處沿邊未開荒地酌給該金夫等認領免交壓荒地價令其明春自行開墾至第三年每熟地一晌仍交大小租市錢六百六十文均著照所籌辦理其查出樺皮甸子半拉窩集地方墾成熟地八百餘晌該民人情願認領交租卽照富明阿等所請准給佃戶認領不追壓荒每熟地一晌連本年共收三年地租市錢一吊九百八十文以示體恤富明阿等於金場流民務當加意鎮撫妥籌永久之法不得有名無實致滋事端仍詳細繪具圖說呈覽吉林善後各事宜卽著該將軍等妥爲籌畫次第興辦兩省會哨一節都興阿以本省向有章程其如何變通擬候議妥再

辦惟時值嚴冬邊境內外難保無匪徒蠢動且長春廳一帶蒙民交雜向爲聚盜淵藪若待議妥章程再行會哨殊形遲緩富明阿見已前赴靠山屯一帶盛京應如何會同巡哨及清理邊界鎮撫流民以籌經久之處卽著都興阿趕緊辦理毋失事機將此各諭令知之○諭趙長齡奏擒匪闖入陝省繞赴渭河擄船紮筏圖竄晉疆疊經官軍擊退請飭鮑超赴潼關會陝軍剿洗各摺片該逆於渭河上游擄船紮筏搭造浮橋均經臬司陳湜督同陳怡昇等帶防兵礮船奮力擊退斃賊多名尙屬得力該撫已調太原鎮蔣臨照等各帶弁兵分段扼守並撥精勇數百名選派營官帶赴渭河北岸協同該處民團扼要防守該臬司卽在風陵渡一帶就近督率所籌均妥惟恐晉省兵勇無多渡口林立防不勝防著趙長齡於各鎮標兵內添調一二千名交陳湜訓練或令陳湜添募勇

丁一二營藉壯聲勢如南岸防軍足敷分布仍可酌量分撥渡過渭河北岸以資協助該撫卽傳諭陳湜認真籌辦務出萬全所有此次防河出力各員弁著趙長齡先行存記俟此股逆匪辦有端倪再行彙案擇保鮑超一軍前令由陝州追剿昨據該提督奏已移師南陽以圖迎剿當經諭令該提督趕緊入關若由內鄉浙川以趨荆子關不數日卽可入陝一與賊遇可以痛加剿洗著曾國藩卽飭該提督酌度地勢賊情何路最爲捷徑卽由何路前進總期痛挫兇鋒力保完善毋任遲回觀望致干重咎豫省之宋慶等軍畱爲防守隘口之用劉秉璋等軍卽可酌量分撥赴陝與鮑超互爲聲援並著曾國藩李鶴年相機調度不爲遙制援軍未到以前喬松年劉蓉當就見有兵力移緩就急設法堵剿毋任鴟張並防其與甘回勾結省城防務妥爲布置毋稍疏失將此由六百里

諭知曾國藩趙長齡李鶴年喬松年劉蓉並傳諭鮑超知之○命都察院左都御史汪元方在軍機大臣上行走○壬寅諭軍機大臣等都興阿奏擒斬首逆並籌邊外防剿情形一摺奉天孤山逆首王作幅經副都統奕榕生擒正法辦理甚屬認真所有未盡餘匪卽著都興阿飭令搜捕淨盡毋任漏網該將軍所籌邊外防剿之方頗爲持重惟時屆冬令草木彫落若不乘時辦理則開春更難措手況富明阿已赴靠山屯該將軍擬出省會商卽著相機興辦不可坐失事機其與吉林派兵會哨之處亦卽舉行所稱於梅河卡倫地方作爲總卡由省撥兵二百名馳赴該處駐紮仍抽調坐卡官員兵一百四十名分起梭巡尙屬妥協著卽照所擬辦理另片奏請畱奕榕暫緩入覲等語奕榕在奉有年辦事最爲幹練見在該將軍出邊東行錦州不可無大員鎮攝奕榕卽著先行赴

任侯奉天無事再行奏請陞見以專責成將此由五百里諭令知之○諭張亮基奏安南縣漢回互訐查辦情形貞豐回匪攻陷興義縣城旋經克復並克復安平鎮甯等城各摺片安南縣知縣張銓與署都司馬金奎因所屬勇丁口角啟釁輒敢縱令團首邱文墅等將馬金奎家資眷屬肆行劫擄以致馬金奎乘閒糾集回眾入城仇殺張銓又復棄城逃逸爲回眾所戕見經將縣城克復據馬金奎聲稱僅止復仇並無叛逆情事著張亮基妥爲查辦固不可操之太急亦不可失之寬縱總須持平辦理俾兩造心服尤須先行曉諭解散黨與以期漸臻安謐至貞豐回眾攻陷興義縣城見雖克復惟此股回匪必須實力剿除不可任其盤踞貞豐蔓延句結所有克復縣城出力員弁兵勇著查明酌保興義府縣兩缺著准其以錢堦兼署鎮甯安平定南各城搜捕餘匪撫綏難民增

設守備諸事宜該署撫當妥籌辦理將此由六百里諭令知之○諭劉長佑嚴緝馬賊餘黨○癸卯山東冠縣逆犯韓玉得謀叛事覺諭步軍統領暨直隸山東督撫嚴緝○劉長佑請撤回花馬池駐紮官兵諭穆圖善妥籌辦理○廣湖北黃岡縣學額四名○乙巳諭內閣山東布政使丁寶楨前因髮捻竄擾所轄境內未能助剿降爲四品頂帶比年以來逆匪屢圖東竄巡撫閻敬銘出省督剿該藩司布置省城防守等事宜均屬妥協尙知奮勉丁寶楨著加恩賞還二品頂帶○諭前據張凱嵩奏官軍擣平山澤賊巢據獲賊供首逆孫芒廣亦經焚死當經諭令張凱嵩嚴查該逆實在下落毋任漏網茲據張凱嵩奏稱審度賊情勢必藏匿復飭道員覃遠璉等分投兜捕九月二十三等日孫芒廣於旺隴村等處節節潛逃知府劉培一帶兵偪進該逆仍敢率黨抗拒官軍搶上

山坡刺傷該逆撲地掄解回城經張凱嵩研鞫各情該逆直認不諱當將該逆及其子亞奉逆黨玉恆照等分別凌遲處死並傳首被害地方以昭炯戒等語孫逆倡亂多年前於逆巢焚毀時假裝逸出該撫分飭各軍多番接捕將稽誅巨寇明正典刑尙足以快人心而舒眾憤該撫以前奏未實自請議處著加恩寬免其鎮安太平等處土匪仍著張凱嵩督飭在事文武實力勦洗以清餘孽○曾國藩奏據劉銘傳潘鼎新呈稱九月初一日該兩軍在梁山破賊後追至鄆城之季家莊與賊相隔半程初三日行抵安興孔集等處探知賊在曹州府東之新集初四日潘鼎新一軍先馳至新集之南該逆正思西竄我軍衝入賊陣截殺數段逆勢奔潰劉銘傳一軍馬步亦到追殺十餘里賊由曹州城北西奔兩軍督隊緊追截殺多名並生擒擒首及賊黨二百餘名初五至初八等日

又追賊於曹縣朱家寨及新考城之敬勝寨統計大小六戰縱橫
盪決無役不勝等語臣查逆眾東犯銳意竄渡運河自梁山一戰
賊勢稍卻尙思畱戀東境爲覓食苟延之計劉銘傳潘鼎新兩軍
盡力追剿窮賊所往遂使悉數敗竄東省運防無恙固由守禦之
嚴亦賴追兵之速在事出力人員應卽歸入前案彙保以昭激勸
又奏任賴一股徘徊黃河南岸黑岡一帶九月十一日賊至榮澤
壩十二日偷窺河隄十三日豫軍礮船趕到會同陸軍宋慶等將
賊擊退張總愚一股由扶溝紛竄西南十四五等日攻撲許州適
張樹珊一軍由山東追賊回豫十五日聞許州告警卽率隊馳援
一擊敗之劉秉璋楊鼎勳兩軍亦馳抵許州之小召鋪逐賊於漢
河東岸頗有斬擒由是各賊遂分東西兩路其東竄者爲任柱賴
汶洸一股西竄者爲張總愚全股牛洛紅已死其子牛喜接管賊

黨或東或西尙無定向臣於十八日檄令劉銘傳潘鼎新張樹珊
三軍馳剿東路鮑超劉秉璋楊鼎勳劉松山專辦西路潘鼎新一
軍二十日自朱仙鎮拔隊四日而馳抵定陶該逆一日夜行二百
餘里先於二十一至二十五等日猛撲運河之袁口開河等處經
東軍竭力擊退潘鼎新趕到後逆蹤盤旋於鄆城鉅野金鄉等處
二十八九兩日潘鼎新在嘉祥剿賊獲勝劉銘傳於二十九日至
鉅野之葛店派張景春等選帶馬隊馳剿十月初一日在羊山擊
賊獲勝追至金鄉東北之周圩收隊見在劉銘傳紮金鄉潘鼎新
紮濟甯之安居賊在金濟之間張樹珊一軍由虞城馳赴單縣聞
賊若不得逞於山東卽竄徐淮圖撲運河李鴻章已至徐州諸軍
畢集當可保全運防徐圖兜擊賊之西竄者由襄城郟縣汝州一
路奔竄鮑超於九月十六日由南陽拔隊初聞賊竄襄城擬由裕

州一路進勦及行抵裕州知賊已竄汝郊卽兼程行走二十一日馳抵魯山而賊已遁往汝州之臨汝白沙地方旋由宜陽永甯連夜狂奔鮑超亦由汝州洛陽跟追二十九日抵宜陽之韓城鎮十月初二日至陝州之章茂寨每日均行八九十里至百里不等劉秉璋楊鼎勦兩軍自許州獲勝後取道新鄭汜鞏一路初二日行至陝州之觀音堂賊知追兵將至遂於閿鄉西南之太峪中繞越潼關以南闖入陝西之商州一帶各軍餉項未到米糧罄盡陝閿商雒萬山之中初冬苦寒士卒寒衣未備萬難再進據逃出難民聲稱賊以陝西無食可覓意欲由荆子關竄往湖北等語商州與鄖陽毗連又近南陽之內鄉鎮平等處鮑超見擬由章茂寨回至南陽劉秉璋擬由觀音堂回至新鄭一面籌備米糧一面備勦回竄之賊劉松山拔隊稍遲初三日甫至汝州因賊去已遠卽在汝

屬暫駐續候調度查東竄一股劉銘傳各軍尙能追及邀擊西路
一股鮑超等奔馳千里未及接仗實深焦憤至陝西艱苦已極不
特官軍米糧子藥籌運萬難卽該逆志在擄掠恐亦無所得食不
久仍將回竄山西防務僅恃一河賊若北渡竄晉爲患正長伏乞
皇上飭下山西撫臣嚴扼河防保全完善之區若僅在秦境則
數月之內又將回竄豫鄂臣已檄飭各軍沿途確探相機迎剿又
奏臣因病難速痊仰蒙 天恩兩次賞假在營調理兩月以來加
意靜攝而心氣過虧不時出汗不能多閱文牘說話逾十餘句舌
端卽蹇澀異常耳亦重聽似此病軀久膺重任斷無不僨事之理
再四籌思不得不仰懇 聖慈准開各缺安心調理惟臣受恩深
重有不敢遽請離營者人臣事君之義苟有所長所短皆可直陳
於 聖主之前臣不善騎馬未能身臨前敵親自督陣又行軍過

於遲鈍十餘年來但知結硬寨打呆仗從未用一奇謀制敵於意計之外此臣之所短也臣昔於諸將來謁無不立時接見諄諄訓誨上勸忠勤以報國下戒騷擾以保民別後則寄書告誡頗有師弟督課之象其餘銀米子藥搬運遠近亦必計算時日妥爲代謀從不誑以虛語此臣昔日之微長也今臣病勢日重憚於見客卽見亦不能多言豈復能殷勤教誨不以親筆信函答諸將者已年餘矣近則代擬之信稿亦難覈改稍長之公牘亦難細閱是臣昔之長者今已盡失而用兵拙鈍勦粵匪或尙可倖勝勦捻匪實大不相宜明知必誤大局而猶貪戀權位不肯直陳是欺君也明知湘淮各軍相信頗深而必遽求離營不顧軍心之渙散是負恩也惟有籲懇 天恩准開協辦大學士兩江總督寶缺並另簡欽差大臣接辦軍務臣以散員畱營不主調度賞罰之權但以維繫將

士之心庶於軍國大事毫無所損而臣之寸心無忝卽病體亦可期漸愈感激 鴻施曷有既極又奏 臣於同治三年七月蒙恩錫封一等侯爵世襲罔替祇承恩命懼弗克勝維時金陵倖克廳立功績皆賴諸將之力朝廷論功行賞恩賚有差各將士皆邀殊榮臣忝居統帥不敢立異固辭然自拜命以來無日不兢兢業業恐負非常之寵而貽不稱之譏去歲奉命勦捻至今已一年零五箇月毫無成效雖 聖主不加譴責而 臣心實覺悚惶應懇 天恩收回成命飭部將 臣所得封爵暫行註銷此後 臣效力行閒如果病體痊愈續有微勞再當乞恩賞還爵秩謹法古人自貶之義以明 臣抱歉之忱李鴻章奏疊據劉銘傳報稱十月初二日賊由金鄉抵豐縣之肅堰初四日我軍截擊斬獲數十人賊折回魚臺初五日追至魚臺李家溝初六日又追至金鄉之羅屯賊先排隊待

戰以馬賊鈔我輜重經張景春等馬隊擊敗遂悉遁走初七日乘霧回竄東南圖走豐沛初八日追至魚臺擒斬尾賊百餘名賊首劉洗遠朱導等率眾投降初九初十等日賊由羅屯羊山一帶南竄劉銘傳追至金鄉城北而賊在城西十一日劉銘傳令劉盛藻由城南黃桂蘭劉朝幹由城西分進唐殿魁在後接應馬隊由旁鈔擊賊遂駭潰擒斬三百餘名追至單縣之雞黍集是日張樹珊已與劉銘傳函約會剿由碭山至豐縣十里外趙家集卽遇馬賊數百張樹珊派閃鳳來馬隊擊之賊縱騎遁去十二日追至豐縣西關外甯家莊探知大股將至紮營甫定馬賊由西北紛來圍逼我營張樹珊先令閃鳳來在前誘敵午刻派各營分路迎剿自率開花礮隊接應賊漸回遁追至距豐縣十八里之橫隄賊整隊回撲爲開花礮轟斃無數賊勢不支竄孫寨東北是夜賊方駐足張

樹珊令各營乘勝急追至豐縣東南張武樓探知馬步大股麇聚
仍分三路一擁而上賊不及備惶遽奔逃我軍盡力砍殺僅逸去
馬賊數十騎計共斃賊千餘名生擒悍賊二百餘名救出難民無
數據獲賊供稱任賴二逆爲我軍截斷任向北竄賴向東南劉銘
傳復於十三日追至豐縣北四十五里之渠家寨賊適攻寨聞信
東走遂併入沛縣湖團見檄催劉銘傳由西路張樹珊潘鼎新
由北路約期齊進並令李昭慶調到濟甯馬隊四營步隊三營會
合徐城防各營馳往迎剿以圖夾擊之效 上諭軍機大臣等
劉銘傳潘鼎新兩軍九月間在鄆城等處盡力追賊屢獲勝仗所
有在事出力人員著歸入前案彙保東西兩路軍情業經劉蓉李
鴻章等奏報與曾國藩所陳大約相同曾國藩令劉銘傳潘鼎新
張樹珊馳剿東路股匪鮑超劉秉璋楊鼎勳劉松山專辦西路股

匪本日據李鴻章奏劉銘傳等於豐縣追剿將任賴二逆截斷任向北竄賴向東南劉銘傳復追賊至豐北之渠家寨賊遂併入沛縣湖團李鴻章見檄劉銘傳等約期會剿卽著督飭諸軍合力剿滅此股以收夾擊之功西路賊股已至同朝華陰節經降旨令鮑超入關未知該提督見已行抵何處曾國藩以該逆股到陝無從覓食數月後又將回竄不知陝之朝邑韓城等處尙多完善地方且回匪盤踞涇州時思回竄陝境兵力單薄若無大枝勁旅援應恐捻回聯成一片關隴數千里之地益遭蹂躪爲患滋深著卽嚴催該提督遵照連日所奉諭旨取道入關探賊所向痛加剿洗毋可遷延干咎劉秉璋等軍能否入陝與鮑超一軍互爲聲援並著酌度調遣內鄉鎮平等處著李鶴年派兵嚴防回竄鄖西二竹一帶著官文曾國荃督飭派出各軍妥爲防剿曾國荃應否至襄陽

一帶駐紮以圖迎剿並著酌量具奏山西河防前已諭令趙長齡督飭陳湜增兵防守卽著傳諭該臬司督率在防兵勇員弁晝夜嚴防如應調兵添勇卽當趕緊辦理毋惜小費而誤大局曾國藩以病未能痊請開各缺在營效力另簡欽差大臣並請暫行註銷封爵覽奏深用馳念該大臣勲望夙著積勞致疾自係實情著再賞假一箇月在營安心調理欽差大臣關防著李鴻章暫行署理曾國藩俟調理就痊卽行來京陛見以慰廬繫朝廷賞功之典具有權衡該大臣援古人自貶之義請暫行註銷封爵著毋庸議李鴻章接署欽差大臣湘淮各軍均歸節制必須迅將東股辦竣方可騰出兵力專意西路卽著通籌全局妥爲辦理應否移紮豫境適中之地並著酌量奏聞吳棠諒未啟程著專辦淮徐一帶防務並派兵協剿竄入湖團股匪俟此股賊眾殄滅淨盡再行馳赴新

任張之萬何時到淮著將漕河各務認真經理並督飭裏下河各州縣嚴防竄匪入境毋稍疏失湖團地方逼近東省閭閻敬銘當派兵協剿毋令闖入東境仍隨時籌辦河防不得稍有懈怠將此由六百里各諭令知之○諭穆圖善奏馳抵中衛相機進剿裁兵節餉並請調西蒙克西克等軍各摺片馬生彥楊汶治遞稟投誠恐其別有詭謀著懷遵前旨酌度情形如果真心悔罪當先收繳馬匹軍械方可擇地分別安插毋爲該逆所紿昨據劉蓉奏擒匪由靈寶闖鄉折由蒿峪小路竄入華陰朝邑等處雒南一路又有賊馬滋擾甘省回匪大股已踞涇州北原分股竄至甯州屬境宜君白水三水各邑均有逆回潰勇紛擾陝省東西兩路同時喫緊劉蓉勢難兼顧且該省兵力甚單亦屬不敷分布穆圖善見在中衛自應先其所急回顧陝省西路卽著該將軍暫緩前赴蘭州仍與

劉蓉悉心會商先將陝甘毗境竄匪迅圖殄滅如陝省兵力空虛該將軍所部有無就近可以抽撥援應之處並著相機調度西蒙克西克程興烈等軍均經劉蓉調赴各路防剿此時萬難抽動穆圖善請調該二軍赴甘之處暫毋庸議靖遠一帶賊氛聚集穆圖善此時又暫難赴省所有鎮遠蘭垣及靖遠一帶剿匪機宜均著楊岳斌統籌兼顧不可稍涉疏懈甘軍見須協助陝省精銳右營及晉省官兵能否裁撤之處著穆圖善趙長齡喬松年劉蓉會商辦理陝省東西兩路軍情並近日如何布置著喬松年劉蓉隨時奏報以聞甯夏滿營兵丁困苦異常穆圖善見裁精銳左營騰出餉需爲挹彼注茲之計嗣後趙長齡即將遣撤勇營兵餉仍籌款補足每年應解十萬兩之數毋令缺乏將此由六百里各諭令知之○予江南陣亡副將周盛武等祭葬世職○丙午諭軍機大臣

等馬新貽奏開辦海甯繞城石塘繪圖呈覽一摺海塘爲東南農
田要務而海甯塘工貼近城垣尤關緊要既據馬新貽督飭道員
陳璣等親加履勘自應趕緊興辦所有海甯魚鱗石工二百六十
餘丈卽照該撫所請揀用舊石如有不敷設法採辦其建復坦水
需用石塊椿木等件務擇堅料以期經久雖採辦維艱亦不可意
存畏難致涉草率所需經費銀二十四萬兩准其照數動用該撫
卽嚴飭陳璣等認真興辦不得稍有偷減儻該道等不能得力並
著嚴行參辦如或工料不能堅固修成後未能經久必將承修各
員著落賠補並從重治罪毋稍玩忽將此由五百里諭令知之○
以湖南布政使石贊清爲太常寺卿○丁未諭軍機大臣等成祿
奏官軍攻剿肅州情形請撥糧石催解協餉軍火各摺片肅州一
城圍攻日久未能克復歷次進剿斬獲亦屬寥寥總兵楊廣德又

復力戰陣亡前據該提督奏稱設法攻勦旦夕克復此次又奏稱賊勢窮蹙均係徒託空言若再任意延誤惟該提督是問其由肅城逸出股匪並未截勦淨盡見由番地散逸難保不復糾番黨回擾大營後路成祿當慎加防範毋稍疏虞前據李鶴年奏稱豫省勇丁應募赴甘未能得力當經諭令成祿飭令丁文學赴甘就地另募勇丁赴營該提督所請催令丁文學在豫募勇之處著毋庸議王佐臣見隨都興阿在奉天披勦餘匪未能赴甘所請調往之佐領奎光本日已有旨令該旗都統並兵部飭令該員由驛前往成祿軍營知州凌振家卽著李鶴年飭令前赴肅州聽候成祿調遣毋庸在豫省等處募勇肅州在營兵勇天寒衣單殊形困苦著楊岳斌飭令甘涼肅所屬將分辦之皮衣趕緊辦齊該營需糧甚殷並著楊岳斌於甘涼安肅就近州縣於本年額徵糧石內分撥

十餘萬石交前敵糧臺存儲並著楊岳斌添派精銳數營迅赴肅州以便成祿交替西行成祿未啟程以前仍當將肅州軍務認真督辦剋期克復若因循畏葸不能攻克肅州又不能奮勇出關任意逗畱該提督自問當得何罪肅州軍火採辦甚難每有停戰待用之虞著河南山東陝西湖北各督撫將每月協濟成祿軍營火藥鉛丸各數千斤議定數目速行奏聞卽按月解交山東山西河南三省餉銀前經戶部議定已專撥李雲麟軍營應用成祿月餉卽著官文曾國荃劉蓉遵奉前諭設法湊解源源接濟毋稍缺乏四川欠解該提督軍餉甚多且已停解新疆月餉卽著崇實駱秉章趕緊籌解成祿軍營餉銀數萬兩不得藉詞延宕以上各處餉銀均著解交山西藩庫由成祿委員提解署阜康令裕厚旣無畏逃情事平日民情愛戴著准其畱於肅州軍營帶團勦賊戴罪自

效將此由五百里各諭令知之○調兆琛爲湖南布政使以繼樹

森爲貴州布政使佛爾國春爲廣西按察使

由桂平格

○于甘肅

陣亡總兵官楊廣德祭葬世職○己酉諭軍機大臣等左宗棠奏

籌辦臺灣吏事兵事請責成該鎮道等經理一摺臺灣一郡遠隔

大洋番民雜處易啟釁端見當生齒日繁洋舶來往尤宜加意整

頓以奠巖疆該督以去閩在卽一切規畫未暇致詳請飭鎮道等

妥辦具見實心所陳臺灣積弊兵制則班戍之期已廢有冊無兵

戰船無一存者而修費不減吏事則官索陋規以取盈民好械鬪

以爭勝錮習相沿殊堪痛恨該督擬復班兵舊章三年更戍復設

道標以重事權申明鎮兵歸道察看之例以互相維制移修船之

費以製船巡洋募練水兵裁革陋規別籌津貼以資辦公各條均

屬因時制宜之策總兵劉明燈道員吳大廷旣經該督遴選派辦

必須實力籌辦以挽頽風不得以該督遠行玩忽於繼並著吳棠徐宗幹隨時督飭該鎮道等認真釐剔所有一切情形或詳由該督撫奏聞或徑由該鎮道會銜陳奏均著斟酌事之輕重緩急辦理生番旣以不得內附爲憾自宜相機駕馭羈縻靡弗絕其社會儲積等事亦應綢繆未雨及早興辦吳棠未到任之先英桂徐宗幹責無旁貸必當善成該督之志也左宗棠另摺奏釐定閩省各屬進出款項請將各廳縣應徵地丁糧米等款數目出示勒石以杜浮取提款籌補流攤以祛官累酌提稅餘以充公費所籌於吏治民生均屬有益卽著照所請行其餘一切未盡事宜該督未啟程以前仍當隨時規畫以臻周密將此由五百里諭知英桂左宗棠吳棠徐宗幹並傳諭劉明燈吳大廷知之○免福建州縣攤捐銀兩○庚戌諭軍機大臣等瑞麟蔣益澧奏西江土客械鬪客民悔

罪投誠給貨遣散並擬移兵進剿五阮等處各摺片廣東肇屬土客結釁十餘年未能辦理妥協經瑞麟等扣留頭目黃煥章等該客眾倉皇逃散並解到匪頭陳長青等五名繳出器械逃赴五阮等處其餘男婦二萬餘名經瑞麟等給予川資飭赴高廉雷韶及廣西等處安插自因土客結仇已深不能分別遣散俾免相尋啟釁惟高廉雷韶民風强悍而廣西土匪尙未淨盡尤恐勾結爲患當此安插之始更宜爲日久相安之計著瑞麟蔣益澧張凱嵩隨時妥商籌辦毋得稍涉大意此次各營兵勇冒暑興師疫病甚多徐文秀等見亦患病未痊其勤勞軍旅甚可廛念著瑞麟等妥爲拊循俾得休息再行進剿五阮曹冲以資得力另片奏客曰黃煥章韓端章賞給功牌暫留省城俟數月後再行釋回等語黃煥章等雖係客目並非謀叛可比若材堪驅策或卽留營差遣將來得

力給以千把總微秩既可使客民感服亦屬易於鈐束著瑞麟等酌量辦理瑞麟等另摺奏粵東拐賣人口出洋之奸徒請於審明後卽行正法等語所見甚是此等奸徒以誘拐人口出洋爲漁利之計其情罪實爲可惡著卽照該督等所擬於審明後爲首斬決爲從絞決由該督撫提勘後卽行正法以挽頽風仍著將決過人犯三箇月彙奏一次以憑查覈其有情願出口者卽照條約辦理毋庸禁阻瑞麟等又奏遵查道員屠繼烈等據實具陳等語除周士俊鄭夢玉二員交軍機處存記候旨錄用外其宋錫庚等二員並著該督撫隨時察看如果出色再行奏聞道員屠繼烈卽送部引見將此由五百里各諭令知之○予貴州陣亡遊擊羅朝翰祭葬世職○辛亥予直隸殉難同知周憲曾建祠○壬子諭軍機大臣等前因閩省設廠製造輪船諭令沈葆楨幫同該省督撫等

悉心區畫嗣據左宗棠奏請派重臣總理船政復諭令沈葆楨總司其事與英桂吳棠徐宗幹會商辦理茲據左宗棠奏該撫兩次呈稱以丁憂人員不應與聞政事如奉旨飭辦亦必俟明年六月服闋後始敢任事其未釋服以前遇有咨奏事件請由督撫臣代爲咨奏等語製造輪船一節關係中外事更重於金革豈得以引避爲辭沈葆楨辦事認真著仍遵前旨總司其事一切應辦事宜均著英桂左宗棠吳棠徐宗幹與沈葆楨隨時會商辦理署藩司周開錫卽著與道員胡光墉一併交沈葆楨差遣惟旣據該前撫呈稱見未服闋未敢公然任事卽著俯順所請未釋服以前遇有應行陳奏事件由沈葆楨知會該督撫代爲具奏一俟服闋仍著會同該省督撫聯銜奏事以重事權其購買機器等項共需銀十三萬三千八百餘兩著照左宗棠所籌先行動款應付以便興辦

將此由五百里各諭令知之○癸丑署兩江總督李鴻章奏賊漸窮蹙見由南路兜扼俾收夾擊之勢得旨逆蹤見竄金鄉羊山一帶著飭劉銘傳等軍馳入東境跟蹤兜剿毋任狂竄○加浙江漢孝女曹娥封號○命劉長佑撥鹽課銀六萬餘兩備天津製礮○甲寅諭麒慶嚴緝朝陽一帶餘匪○乙卯諭軍機大臣等穆隆阿等奏擒逆竄入陝境防剿喫重並布置省防請調金順馬隊赴陝各摺片前據劉蓉具奏擒回各情諭令曾國藩迅催鮑超入關助剿曾國藩亦奏稱責成鮑超等軍專剿西路之賊陝省回捻交訖不遑兼顧若無大軍助剿則任賊久踞爲患不可勝言著曾國藩李鴻章迅催鮑超等軍剋期入關相機剿辦陝省回民固宜防範值此外匪竄入之時但當示以誠信不可使之疑懼著劉蓉會同穆隆阿圖明額不動聲色暗爲防閑毋令變生肘腋此中機宜諒

劉蓉自能斟酌辦理無煩諄諄指示喬松年見在行抵何處陝省情形如此喫緊該撫當兼程前進豈可徘徊觀望希圖諉卸著迅速赴任會同劉蓉妥爲經理陝省情形喬松年自不如劉蓉之熟悉喬松年到後劉蓉仍當實心經理隨時奏報喬松年不得稍形掣肘甯夏防務雖鬆而程興烈西蒙克西克兩軍已令交劉蓉調遣並令穆圖善酌撥防兵先顧陝省所有金順馬隊難再抽調穆隆阿等所奏著毋庸議將此由六百里各諭令知之○諭劉長佑閻敬銘嚴緝教匪○是月豁免安徽壽州等五十六州縣被水新舊額賦蠲緩直隸開州等三州縣緩徵直隸安州等二十二州縣被擾被水被旱被雹新舊額賦暨海防河淤地租倉穀